

Maria Antonia Cavegn-Blumenthal



L'antieriura calustra da Rueras ei naschida a Rumein en Lumnezia sco feglia da Gion Giusep Blumenthal e Giulia Derungs. Ina famiglia cun otg affons; tschun feglias e treis fegls. Nossa defuncta fuva ualti amiez e ha surviviu tuts ses fargliuns.

Gia en giuvens onns ha ella giu la sort dad ira egl jester e schigiar il paun cun siat crustas. 1936 ha ella fatg enconuschiantscha cun il giuven Vigeli Cavegn da Rueras ed ils 15 d'october dil medem onn vegnan els enzinai en a Mustér da pader Placi Berther. Enzaconts onns han els surviu a Laax

sco fumitgasa e fumegl. Lezs onns da miserabla conjunctura e pauca lavour, han dau il stausch da retuorn en la patria Tujetschina. Cun treis affons pigns ein els vegni a Rueras e secasai cheu en affitaziun. En tut han els giu tschun affons. In ei morts da baret.

Biars onns ha ei tuccau ad els dad ira ina dira via, da lavur e spargn. Mo la famiglia ei serescudida detg pulit, quei buca il davos muort l'energia e lavur dalla mumma defuncta. En contact cun ella vevan ins il sentiment ch'ella seigi magari buca maneivla. En sesez fuva ella, forsa buca il davos tras la direzia dalla veta, ina nusch cun ina dira crosa entuorn in bien coc e nuscheogl. Ils 22 da fenadur ha il zenn da miert annunziau sia mort, per ils biars tut nunspetgadamein.

Als da Rueras ha ella surviu en treis gadas ca. 20 onns cun premura sco calustra. Ussa ruaussa ella sin santeri da sogn Vigeli. Magari maunca sia originalitat en nies vitg. Per tuttas stentas e lavurlein nus engraziar alla defuncta, seregurdond cun pietad e carezia dad ella. A sia famiglia nossa condolentscha.